

«Tuorbel/diffus» – niev program digl Ensemble ö!

David Sontòn Caffisch ha presentau ils sis concerts dalla stagiun 2017/2018

■ (anr/abc) **Novas ovras dil 20avel e 21avel tschentaner, presentar nova musica: Quei ei la finamira digl «Ensemble ö!» Il menader musical David Sontòn Caffisch e ses conmusicists sunan il mars 2018 al «London Ear Festival».** En Svizra ed els cerchels d'enconuschiders da litteratura da musica contemporanea ei quella formaziun ina noziun renomada: Igl ensemble ö! seproflescha oravontut ellas metropolaz svizras. A Basilea ei la sedia, leu se presenta el cun success ad in publicum che vul dapli che Mozart e Händel. Igl ensemble ö! sededichesch a cumposiziuns novas ch'ei fatgas naven da 1900 tochen oz. Il mentur, grond promotur, violinist e cumponist ei *David Sontòn Caffisch* ed el vegn da Trin. Cun sia patria eis el colligiaus stretgamein e perquei producscha el onn per onn in program ch'el vul era presentat el Grischn. Dacuort ha el presentau allas medias il program dalla stagiun 2017/2018. Sustenius dall'uniun da promoturs digl ensemble, mo era da sia sora *Riccarda Caffisch* possibilitescha el ina retscha da concerts el Teater dil marcau a Cuera. Il program ei identics cullas presentaziuns ella «Maison 44» a Basilea.

Corifea ei da Trin

Uonn han il president niev dall'uniun da promoturs, *Johannes Schlegel*, e la meinagestiu, *Franziska Ruoss*, accompignau David Sontòn Caffisch alla conferenza da medias. Omisdu s'engaschan pigl ensemble ö! perquei ch'igl ei ina purschida unica e fetg extraordinaria. «Jeu sun fetg impressiuus dalla professionalitad, dil concept dil program e dall'originalitad da quei ensemble», ha Schlegel declarau. El ei percharts che David Sontòn Caffisch ei in profet ell'atna tiara. Malgrad quei dat il success giu la Bassa raschun ad el. Il musicist da Trin vala en Svizra sco ina dallas corifeas renomadas el sectur dalla



David Sontòn Caffisch muossa culla marella ellas notas: Per veser il diffus, il tuorbel, per capir ed avischnar drova ei quella.

FOTO A. BEEU

musica nova. Ch'igl ei buca musica populara ha il musicist declarau enten explicar la retscha da concerts dalla stagiun 2017/2018.

A Cuera e Basilea presentan ils instrumentals sis concerts. Igl emprasan ins tedlar gliendis proxims, ils 18 da settember el Teater dil marcau a Cuera. Il medem concert lu vendergis, ils 22 da settember 2017 ella Maison 44 a Basilea. El center ein ovras dad *Asia Ahmetjanova* (*1992), da *Vittorio Monti* (*1984), *Enno Poppe* (*1969) ed auters. Per part eis ei premaidiziuns. La

nova stagiun ha retschert il tetel «unschärfe», quei ch'ins sa translata per romontsch sco tuorbel, diffus. Il suttetel digl emprasan concert ei «materia sco unda». Mintgin dils sis concerts ha dil reminent in suttetel, ulteriurs concerts sededichesch a «sfumato», «glisch», «cosmos», «plasma» e «dimensiuns».

Fisica e mecanica dalla quantica

Ella presentaziun dil program ha David Sontòn Caffisch declarau ch'il tetel principal, il tuorbel, il diffus, hagi dus origins. Inagada seigi quei la tecnica dil

sfumato che Leonardo da Vinci ha sviluppu. Sin cozzas da color gia schetgas malegiava el biaras ulteriurs lasuras cun pigments alvs, quei deva l'impressiu d'ina surfatscha diffusa. «Quei selai cumparegliar bein cullas ovras dalla musica nova nua ch'ei dat era biars scallems da melodia e ritmica el medem mument», gi il menader musical digl ensemble ö!

In secund connex ha il tuorbel/diffus culla mecanica dalla quantica. Suenter la teoria dalla relativitad eis ei la secundimpurtonta part dalla fisica moderna. Igl

auditori che viseta ils concerts digl ensemble ö! ei disaus ch'ils concerts entscheivan cun ina introducziun a bucca. Gest tier la tematica descretta ei quella moda cumprovada in mied per avischnar als tuns. Capir musica moderna ei buca adina sempel, tonpli ch'igl ei musica atonala cun ritems complexs, 16avlas, tuns che van buca mo tgunsch da capir, segls e dissonanzas. La microtonalid influenzescha la retscha da concerts dalla stagiun 2017/2018. «Ins sto buca capir mintga tun», declara David Sontòn Caffisch. El e siu ensemble vulan intermediar ed avischnar a musica fetg pretensiusa che cumponists contemporans han scaffiu. Ils adherents dalla musica nova ch'enconuschan ils programs dad ensemble ö! selegran perinagada sin sis sentupadas, sin sis caschuns da tedlar e seschar tschaffar. Sper ils sis concerts fixes dil program ei igl ensemble envidaus la proxima stagiun a divers occurrenz. Denter auter vegn el a separticipar a Londra al «London Ear Festival» che ha liug dils 22 tochen ils 25 da mars 2018.

Ulteriurs informaziuns mira: www.ensemble-oe.ch

Igl ensemble

La stagiun 2017/2018 secumpona igl ensemble ö! dils suandonts musicists: Irina Ungureanu (sopran); Anna-May Krüger (sopran); Riccarda Caffisch (flauta); Pilar Fontalba (oboa); Manfred Spitaler (clarinetta); Jens Bracher (trumbetta); David Sontòn Caffisch (violina); Sofia Sulдина (violina); Geneviève Camenisch (viola); Christian Hieronymi (violoncello); Daniel Stalder (battaria); Asiya Ahmetjanova (clavazin); Yujin Seong (gayageum); Francisc Prat (direzziun).

Sanaziun da la galaria Lucmagn è ina sfida

■ (rtr) **Fin 2020 vegn la galaria sin il Pass Lucmagn sanada per var 25 milliuns francs. Per ils lavurers è la sanaziun ina sfida. Er en l'intern vegn sanà. Uschia dat quai novas ancras che tanschan fin 12 meters en il culm.** La galaria è passa 50 onns veglia ed è en in nausch stan. Tras il palantschieu sura penetrescha per part aua, quai ch'è tar temperaturas bassas e l'enviern malsegir per ils automobilists. Ultra da quai fa l'aua che schela era donn a la substanza da la galaria.

Latiers vegn ch'il pass è dapi prest 20 onns avert l'enviern, e perquai vegn sterni sal per impedir ch'i dettia glatsch sin via. Quai fa anc dapli donn tenor il manader da project da l'Uffizi da construcziun bassa dal Grischn, *Josef Kurath*. La stresa fina da betun laschia penetrar aua e quella corodeschia cun il fier en la miraglia e fetschia donn. Quai stoppia vegnir sanà.

Lavurar fin l'october

Il tetg da la galaria sto lura anc vegnir rinforzà en tscherts lieus. Tenor Kurath èsi da calcular tar tscherts tschancuns ch'i possa s'emplunar entras lavinas var 10 meters naiv sin la galaria. Per quest intent vegn il material che covra la galaria prendi davent. Ultra da quai sto il tetg era vegn sanà uschia che nagin'aua na po pli penetrar en la miraglia. Il tetg ed ina part dal mir davos da la galaria vegnan cuverts cun ina sort matta da plastic che na lascha betg pli penetrar l'aua. Per che quella possa vegnir culla e sa collia cun il betun dovria quai temperaturas sur nulla

grads. Uss, il settember na saja quai dentant savens betg pli il cas e perquai è vegn costruì ina tenda che vegn stgaudada sur la part da la galaria nua che questa lavur vegn fatga. Uschia quintan ins da savair lavurar fin viaden en l'october.

Lavurar sin 1900 meters sur mar po dentant er esser privlus. Uschia vegn tegnì en egl durant la stad la gripa e las spundas sur ils plazzals da bajegiar. Gist suenter pli grondas plievias pudess crappa crudar giuador. En cas da privel vegniss il plazzal serrà. L'enviern vegn sajettà lavinas e quai preventiv. Uschia vegn la naiv giuador cuntinuadamain e betg pir la primavaira in grond quantum.

Normas da segirtad ston vegnir resguardadas

Cun la sanaziun vegnan las portas da fier ch'en avertas durant la stad allontanadas. Sco quai che Kurath di sajan questas en in nausch stan e vegnian remplazzadas entras elements da betun prefabritgads. Quels cuntregnan elements da vaider che laschan vegnir glisch en la galaria. Sper quai vegn montadas glischs en la galaria, sco era telefons d'urgenza ed equipament da stizzar fiu. Damai che la galaria vala da nov sco tunnel l'enviern dovria sper questas adattaziuns da nov era stanzas da protecziun per exempel en cas d'incendis, sco Kurath ha declerà. Tschintg autobus vegnan per quel intent bajegiads vi dal maun sut da la galaria. En quels pon ils automobilist lura fugir. En las stanzas da protecziun regia ina surpressiu uschia ch'eventual fim na po betg entrar. En questas stanzas ston las persunas lura

spetgar fin ch'ils pumpiers arrivaran. La stad cura ch'i n'ha betg naiv pon ils automobilists salvar sasezs. Lura datti sper las stanzas da protecziun ulteriurs extras da d'urgenza che mainan or en il liber.

Oriundamain pli curta

Cun construir il lai da fermada da S. Maria ha la via sur il Pass Lucmagn stui vegnir

dischlocada. Perquai era la galaria al pe dal Piz Scopi vegnida costruìda dal 1961 fin il 1965. Gia paucs onns pli tard è la galaria vegnida prolungada per 100 meters vers Medel. Dus autos eran numnadamain vegnids gist avant la galaria en ina lavina, trais persunas èn mortas. Cun la prolungaziun è era la punt sur l'aua dal Scopi vegnida integrada en la galaria. Suenter la sanaziun da

la galaria existenta èsi previs da prolungar la galaria ina ulteriura giada vers Medel. Questa giada per var 320 meters. Questa prolungaziun è calculada cun 12 milliuns francs. La decisiun n'è dentant anc betg crudada definitivamain. Cun la prolungaziun pudess ins augmentar la segirtad l'enviern e reducir il dumber da dis ch'il pass sto vegn serrà pervi da lavinas.



Er en l'intern vegn sanà. Uschia datti novas ancras che tanschan fin 12 meters en il culm.

FOTO RTR